

পবিত্র ইঞ্জিল শরিফ ২০ নম্বর ছিপারা আল-ইয়াকুব পরিচিতি

আল্লা পাকর হুকুমে অউ ছিপারা লেখছইন হজরত ইছা আল-মসীর হাতন ভাই হজরত ইয়াকুব (রা:)। হজরত ইছা বেহেস্তো তশরিফ নেওয়ার অনুমান ১৩-১৮ বছর বাদে ইখান লেখা অইছে। অউ লেখক তো বনি ইসরাইল খান্দানর মুল বাফ হউ হজরত ইয়াকুব (আ:) নায়। আর হজরত ইছার বারোজন সাহাবির মাজর একজনর নাম আছিল জিবুদিয়ার পুয়া ইয়াকুব, এইনও অউ ছিপারার লেখক নায়। অইলে অউ লেখক তো জেরুজালেম জমাতর বড় মুরবিব নেতা (সাহাবি নামা ১৫ রুকু)। তাইন আল-মসীর বেয়াপারে তবলিগ করার সময় নাফরমান ইছদি অকলর আতো পবিত্র বায়তুল-মুকাদ্দছো শহীদ অইছলা।

অউ ছিপারা তিলাওত করলে, হজরত ইছা আল-মসীর উন্মত অকলে দুনিয়াবি জিন্দেগি কাটানির লাগি কুন লাখান ইমান-আকিদা, আমল-খাছলত করা জরুরি, অউ বেয়াপারে জানা যাইবো। এর তালিমর লগে হজরত ইছার “পাড়র উপরর তালিম” অর লগে পবিত্র ইঞ্জিল শরিফর মথি ছিপারার ৫-৭ রুকু বউত মিল আছে। অউ ছিপারার ১ রুকু ২৬ আয়াতো আছে, “যে মানষে নিজরে পরেজগার মনো করে, অইলে নিজর জিফরারে সামলায় না, হে তো তার নিজরে টগে, তার হক্কল এবাদতিউ মিছা।”

এরমাজে আছে,

- (ক) আসল ইমান আর আমল ১-২ রুকু
- (খ) জিফরা সামলানি আর আসল আখল-হেকমত ৩ রুকু
- (গ) মাইর-দরবার, গিবত, বড়াই, জুলুম না করা ৪:১-৫:৬ আয়াত
- (ঘ) ছবর, মুনাজাত আর হেদায়ত করা ৫:৭-২০

1 আমি ইয়াকুব, আল্লা আর হজরত ইছা আল-মসীর গুলাম, দুনিয়ার নানান দেশে ছিতরাইল বনি ইসরাইলের বারো গুপ্তির মানষরে ছালাম জানাইরাম।

ইমান আর হেকমত

2 ও আমার ভাই অকল, তুমরা য়েবলা নানান জাতর পরিষ্কার মাজে পড়ে, ই সময় ইতা খুব খুশির বেয়াপার মনো করিও।

3 জানো তো, ইমানর পরিষ্কার তুমরারে থির থাকার খেমতা বাড়াই দেয়।

4 আর ই থির থাকার খেমতারে কামো লাগাও, যাতে তুমরা কামিল আর খাটি অইয়া তুমরার কুনু কমতি না রয়।

5 তুমরার মাজে কেউরর যুদি আখলর কমতি থাকে, তে হে যানু আল্লার গেছে চায়, তেউ পাইব। তাইন কুনু বেজারি ভাব না আনিয়া হক্কলরেউ বেহিসাব দান করইন, খালি আতে ফিরাইন না।

6 অইলে হে মনো কুনু সন্দয় না রাখিয়া একিন করিয়া চাইতে অইবো। য়ে সন্দয় করে হে তো দরিয়ার চেউর লাখান, তারে আউলা-জাউলা বাতাসে উড়াইয়া লইয়া যায়।

7 ইলাখান মানষে যানু মাবুদর গেছ থনে কুস্তা পাওয়ার আশা না করে,

8 হে তো দু-দিলা মানুষ, তার হকল কামোউ অশান্তি।

গরিব আর ধনি

9 য়ে ইমানদার ভাই গরিব, তারে বড় বানাইছইন করিয়া হে নিজরে মুবারক মনো করউক।

10 আর য়ে ধনি, তারে ছরু বানাইছইন করিয়া হে-ও নিজরে মুবারক মনো করউক, কারন হে ঘাস ফুলর লাখান জরিয়া পড়িযিবো।

11 সুরুজ য়েবলা উঠে, ই সময় তার তেজে ঘাস ছকাই যায়, ফুল জরিয়া পড়িযায়, আর তার সুন্দর নষ্ট অইযায়। ধনি মানুষও অলাখান তার ব্যস্ততার মাজে জরিয়া পড়িযিব।

12 মুবারক হউ জন, যে জন পরিষ্কার সময় মজবুত রয়। পরিষ্কাত কামিয়াব অইলে জয়র মালা হিসাবে হে আখের পাইবো। অউ মালা তান আশিক অকলরে দিবা করি স্বয়ং আল্লা পাকে ওয়াদা করছইন।

13 কুনু মানষে গুন্যার বায় এশকি অইয়া যানু না কয়, আল্লায় আমারে গুন্যার পথে টানিরা। কুনু নাফরমানির পথেউ আল্লারে টানা যায় না, তাইনও কেউররে ই পথে নেইন না।

14 অইলে মানষর নিজর দিলেউ টানিয়া নিয়া তারে ফান্দো ফালায়।

15 বাদে দিলর বদ নিয়ত পুরা অইলে গুন্যার বিচ পেটো লয়, আর গুনা বড় অইয়া মউতর জনম দেয়।

16 ও আমার মায়ার ভাই অকল, তুমরা অউ লাখান ভুল করিও না।

17 হক্কল ভালা আর নিখুত দান তো বেহেস্তু খনে লামিয়া আয়, যেইন আছমানি নুর অকল পয়দা করছইন, হউ আল্লার গেছ খনে আয়। অউ নুর অকল ছেবার লাখান ডুলাডুলি করলেও, তাইন ইলা করইন না।

18 তাইন নিজর খুশিয়ে আমরারে হক কালাম দিয়া তান বন্দা বানাইছইন, আমরা যানু আশরাফুল-মখলুকাত, সৃষ্টির সেরা মানুষ অই।

কালাম হনিয়া আমল করা

19 ও আমার মায়ার ভাই অকল, মনো রাখিও, তুমরা আগে হনো বাদে মাতো, জলদি গুছা করিও না।

20 মানষে গুছা করলে আল্লার দরবারো কুনু ভালা কাম করতো পারে না।

21 গতিকে তুমরা হক্কল জাতর হারাম আর নাফরমানি কাম বাদ দিলাও। তুমরার দিলর মাজে যে কালাম রুগা অইছে, নরম দিলে অউ কালাম কবুল করে। তুমরারে তরানির খেমতা ই কালামর আছে।

22 আল্লার কালাম খালি হনলেউ অইতো নায়, অলাখান আমলও করে। কালাম হনিয়া যুদি আমল না করে, তে তুমরা নিজরে টগিরায়।

23 কেউ যুদি ই কালাম হনিয়া আমল না করে, তে হে অউ মানষর লাখান, যে আয়নাত নিজর চেরা দেখিয়া যায়গি,

24 বাদে হরিয়া গিয়া ফাউরিলায় তার চেরা কিলাখান।

25 অইলে যে খাটি আইন মানষরে আজাদ করে, আর অউ আইনর বায় নজর রাখিয়া যেরা হামেশা জিয়াইল রয়, ইতা হনিয়া হারি ফাউরে না, আমল করে, তারা হকল কামো মুবারক অইবো।

26 যে মানষে নিজরে পরেজগার মনো করে, অইলে নিজর জিফরারে সামলায় না, হে তো তার নিজরে টেগে, তার হক্কল এবাদতিউ মিছ।

27 এতিম অকলরে আর ডাড়ি বেটিন্তরে বিপদর সময় সায়-সাইয্য করা, এরলগে দুনিয়ার হকল নাফরমানি থাকি নিজরে পাক-ছাফ রাখাউ অইলো, আল্লার নজরো খাটি আর ছহি এবাদতি।

2

হকলরে এক নজরে দেখা

1 ও আমার ভাই অকল, তুমরা য়েবলা আমার কুদরতি মালিক হজরত ইছা আল-মসীর উপরে ইমান আনছো, তে হকলরে এক নজরে দেখিও।

2 ধরো, একজন মানুষ তুমরার মজলিছ খানাত সুন্দর কাপড়-চুপড় ফিন্দিয়া আতো সোনার আংটি লাগাইয়া অইলো, আর ময়লা কাপড় ফিন্দিয়া একজন গরিব মানুষও অইলো।

3 তুমরা যুদি সুন্দর কাপড় আলা মানষর মুখেদি চাইয়া কও, “আপনে অউ ভালা জাগাখানো বউক্লা,” আর গরিব বেটারে কও, “ওবা, তুই হনো উবা, আরনায় আমার পাওর কান্দাত বও,”

4 তে তুমরা নিজর মাজে হার-পর কররায় না নি, আর শয়তানি নিয়তে বিচার কররায় না নি?

5 ও আমার মায়ার ভাই অকল, হনো। ই দুনিয়ার গরিব মানষরে আল্লায় পছন্দ করছইন না নি ইমানে ধনি বানানির লাগি? আল্লার আশিক মানষরে আল্লায় যে বাদশাই দেওয়ার ওয়াদা করছলা, ই বাদশাইর মালিক অওয়ার লাগি তাইন গরিব অকলরে পছন্দ করছইন না নি?

6 অইলে তুমরা তো ই গরিব অকলরে এলামি করছে। ধনি অকলে কিতা তুমরারে জ্বলুম করে না নি? তারাউ তো তুমরারে টানিয়া-ছেছরাইয়া বিচারো লইয়া যায়।

7 যে মহান নামর খাতিরে তুমরারে ডাকা অয়, তারা কিতা ই নামরে লইয়া কুফরি করের না নি?

8 পাক কিতাবো লেখা আছে, “তুমার আরি-ফরিরে নিজর লাখান মায়া করিও,” তুমরা যুদি হাছাউ আল্লার বাদশাইর অউ হুকুম আমল করো, তে তো ভালাউ কররায়।

9 অইলে তুমরা যুদি হকলরে এক নজরে না দেখো, তে তো গুনা কররায়, আর শরিয়তর বরখেলাফ করিয়া দুষি অইরায়।

10 কেউ যুদি শরিয়তর হক্কল হুকুম আমল করিয়াও খালি এক হুকুম ভাংগে, তে ধরা অইবো হে আস্তা শরিয়তউ অমাইন্য করছে।

11 কারন যেইন কইছইন, “জিনা করিও না,” তাইনউ হিরবার কইছইন, “খুন করিও না।” তে তুমি যুদি জিনা না করিয়া খুন করো, তেবউ তো শরিয়তর বরখেলাফ করছে।

12 যে আইনে মানষরে আজাদ করে, অউ আইন দিয়াউ তুমরার বিচার অইবো। গতিকে বুজি-হনি মাত মাতো আর কাম করো।

13 মনো রাখিও, যে মানষে দয়া করছে না, বিচারর সময় তারেও দয়া করা অইতো নায়া। হাশরর ময়দানো দয়াগির অকলেউ দয়া পাইব।

ইমান আর আমল

14 ও আমার ভাই অকল, কেউ যুদি কয় আমার ইমান আছে, অইলে আমল না করে, তে ফায়দা কিতা অইবো? ই ইমানে তারে বাচাইতো পারবো নি?

15 মনো করো, তুমরার কুনু ভাই বা বইনর ঘরো খানি নাই, ফিন্দার কাপড়ও নাই।

16 ই হালতে যুদি তারে কও, “তুমার ভালাই অউক, খাইয়া-ফিন্দিয়া সুখে রও,” অইলে তার নিদান হরানির লাগি কুনু উপায় না করো, তে তার কুনু ফায়দা অইলো নি?

17 অলাখান যে ইমানর লগে আমল নাই, ই ইমান তো মুর্দা।

18 মনো করো কেউ কইলো, “তুমার ইমান আছে আর আমার আমল আছে।” ঠিক আছে, তুমার আমল ছাড়া ইমান আমারে দেখাও, আর আমি তুমারে আমার আমলর মাজ দিয়া ইমান দেখাইমু।

19 তুমি একিন করছো আল্লা এক, খুব ভাল কথ। ভুতেও তো অলা একিন করে, আর আল্লার ডরে কাপে।

20 ও বেআখল, তুমারে আমি কিলা বুজাইতাম, আমল ছাড়া ইমান তো কনু কামর নায?

21 আমরার বাফ ইব্রাহিমে য়েবলা তান পুয়া ইসহাকরে কুরবানি দেওয়ার লাগি কুরবানির জাগাত নিছলা, ই সময় কিতা তান ই কামর লাগি তানরে পরেজগার হিসাবে কবুল করা অইছে না নি?

22 তুমি তো দেখছো, তান ইমান আর আমল একলগে কাম করছিল, আর আমলর লাগিউ ইমান কামিয়াব অইলো।

23 অলাখান পাক কিতাবর আয়াত পুরা অইলো, “ইব্রাহিমে আল্লার ওয়াদায় ইমান আনায়, আল্লায় তানরে দীনদার কইয়া কবুল করলা।” তান উপাধি দিলা আল্লার দুস্ত।

24 তুমরা তো দেখলায়, আমলর লাগি মানষরে পরেজগার হিসাবে কবুল করা অয়, খালি ইমানর লাগি নায।

25 অউ লাখান হউ ছিনাল বেটি রাহবারেও তাইর আমলর লাগি পরেজগার হিসাবে কবুল করা অইছিল না নি? তাই তো হউ দুইও গুইয়ারে লুকাইয়া রাখিয়া, দুছরা পথেদি ছহি-ছালামতে বার করি দিছিল।

26 অউ হালতে আমরা বুজতাম পারি, রুহ ছাড়া কায়া মুর্দা, আমল ছাড়া ইমানও মুর্দা।

3

জিফরা সামলাইয়া রাখা

1 ও আমার ভাই অকল, তুমরা হকল উস্তাদ অইও না। তুমরা তো জানো, আমরা উস্তাদ গতিকে আমরা বিচার আরো কঠিন অইবো।

2 আমরা হকলউ নানান নমুনায় বে-পখি অই। কেউ যুদি জবান দিয়া কুনু গুনা না করে, তে হে কামিল মানুষ, তার আস্তা শরিলউ সামলাইতো পারবে।

3 ঘোড়ারে সামলানির লাগি মুখো লাগাম লাগাইয়া আমরা যেবায় ইচ্ছা অবায় নিতাম পারি।

4 আর কাড়ালিয়েও হরু এক কাড়াল ধরিয়া বড় বড় জাজরে তুফানি বাতাস ঠেলিয়া, যেবায় খুশি অবায় নিতো পারে।

5 অউলা জিফরা খুব হরু অইলেও বউত বড় বড় মাত মতে।

আর সামাইন্য আগুইনে কিলা বড় জংগল জালাইতো পারে!

6 জিফরাও অলা এক আগুইন। আমরা শরিলর মাজে জিফরা একটা খারাপির ভান্ডার, জাহান্নামর আগুইনে জিফরারে জালায় আর জিফরায় আস্তা শরিলরে জালাইয়া কলংকি বানাইয়া, আমরা জিন্দেগিত আগুইন ধরায়।

7 মানষে যদিও হকল জাতর পশু-পাখি, হাফ-বিচ্ছু আর দরিয়ার বড় বড় মাছরে সামলাইছে আর অখনও সামলায়,

8 অইলেও হরু-মুরু জিফরারে কেউ সামলাইতো পারে না। ইখান খুব চঞ্চল আর খারাপ, বেজুইতা বিষে ভরা।

9 এক জিফরা দিয়াউ আমরা গাইবি বাফ আল্লার তারিফ করি, হিরবার অউ জিফরা দিয়াউ আল্লার ছুরতে পয়দা করা মানষরে বদদোয়া দেই।

10 এক মুখ থাকিউ তারিফ আর বদদোয়া বারইয়া আয়। ভাই অকল, ইতা তো ঠিক নয়।

11 বরনার মুখ থাকি একলগে মিঠা আর তিত্তা পানি বারইয়া আয় নি?

12 ভাই অকল, আম গাছে কিতা জাম ধরে নি? আর আংগুর গাছে আম ধরে নি? অউলা তিত্তা পানির মাজে মিঠা পানি মিলে না।

দুই নমুনার আখল-হেকমত

13 তুমার মাজে আখল-হেকমত আলা কেউ আছে নি? থাকলে হে ভালা আমল-খাইছলতে নরম অইয়া অতা দেখাউক।

14 অইলে তুমরার দিল যুদি ইংসায় তিত্বা অইয়া স্বার্থয় ভরা থাকে, তে তুমরা বড়াই করিয়া হাছারে মিছা বানাইও না।

15 ইলাখান হেকমত বেহেস্তু খনে আয় না, ইতা দুনিয়া, খারাপ নফছ, আর ইবলিছ থাকিউ আয়।

16 কারন যে জাগাত ইংসা আর স্বার্থপরি থাকে, ই জাগাত ফিতনা-ফসাদ আর হকল জাতর নাফরমানি থাকে।

17 অইলে বেহেস্তু থাকি যে হেকমত আয়, ইকটা অইল খাটি। ইকটা শান্তিয়ে ভরা, ছবরআলা আর নরম মিজাজি, দয়া আর হক কামে ভরা, তার মাজে কুনু হার-পর বা ভভামি নাই।

18 যারা সমাজো শান্তির বিচ ছিটায়, তারার ফল অইলো পরেজগার জিন্দেগি।

4

মাইর-দরবারর খুটি

1 তুমরার মাজে কুয়াই খনে মাইর-দরবার আর কাইজ্জা পয়দা অয়? তুমরার সুখর খাইশে শরিলর যে রিপুয়ে লাড়াই করে, অগু থাকিউ আয়।

2 যেতা তুমরার নায়, অতা তুমরা মনে মনে চাও, এরলাগি তুমরা খুন করে। আর লালছ করে অইলে পাও না, এরদায় তুমরা মাইর-দরবার আর কাইজ্জা করে। তুমরা তো চাও না, এরদায় পাও না।

3 আর চাইলেও পাও না, কারন তুমরা তো বদ নিয়তে চাও, যেলা তুমরার মনর খাইশ পুরা অয়।

দুনিয়ার দুস্ত আল্লার দুশমন

4 ও বেইমান অকল, তুমরা কিতা জানো না নি, দুনিয়ার লগে দুস্তির মানি আল্লার লগে দুশমনি? যে দুনিয়ার মায়ায় বুড়ি যায়, হে আল্লার দুশমন অইয়ায়।

5 “আমরার ভিতরে যে রুহ দেওয়া অইছে, ইকটায় আমরারে ইংসার বায় টানো” পাক কিতাবর অউ তালিম কুনু এমনে বাতাইল অইছে নি?

6 অইলে ইতা থাকি আমরার উপরে আল্লার রহমত আরো বেশি। এরলাগি কিতাবর মাজে লেখা আছে, “বড়াই কররার উপরে আল্লায় আত তুলইন, অইলে নরম মানষরে রহম করইন।”

7 গতিকে তুমরা আল্লার জিন্মায় রইয়া শয়তানর মুকাবিলা কেরো, তেউ হে তুমরার গেছ খনে বাগিবো।

8 আল্লার বায় চাও, তেউ তাইনও তুমরার বায় চাইবা। ও গুনাগার অকল, তুমরা নিজরে পাক-ছাফ কেরো, ও দুদ্দা দিলা মানুষ, তুমরার দিল খাটি কেরো।

9 দুখে কাতর অইয়া আহাজারি কেরো, আসির বদলা কান্দো, খুশির বদলা মাত্হম কেরো।

10 মাবুদর দরবারো নতো অও, তেউ তাইন তুমরারে উচা করবা।

গিবত আর বিচার

11 ও ভাই অকল, তুমরা একজনে আরক জনর গিবত গাইও না। কেউ যুদি ভাইর বদনাম গায় বা তার বিচার কেরে, এর মানি হে শরিয়তর বদনাম করলো আর শরিয়তর বিচার করলো। তুমি যুদি শরিয়তর বিচার কেরো, তে তো শরিয়ত মানরায় না, উল্টা তার বিচার করাত খাড়া অইছো।

12 শরিয়ত আর বিচারর খেমতা খালি একজনর আতোউ আছে। তাইনউ বাচাইন, তাইনউ মারইন। তে আরি-ফরির বিচার কররা তুমি আরক জন কে?

ফুটানি দেখাইও না

13 ছনো, তুমরা যারা কও, আইজ বা কাইল আমরা অমুক টাউনো যাইমুগি, গিয়া হনো এক বরছ রইয়া কায়-কারবার করিয়া লাভ করমু।

14 অইলে কাইলকুর খবর তো তুমরা জানো না। তুমরার জিন্দেগিউ বা কিতা? তুমরার জিন্দেগি তো কছু পাতার পানি, খুড়া সময় থাকে, বাদে পড়িয়ায়।

15 এরদায় ইলা না কইয়া অলা কও, “ইনশাল্লা, আমরা হায়াতি পাইমু, আর অতা-হতা করমু।”

16 অইলে তুমরা তো বড়াই করিয়া ফুটানি দেখাইয়ায়। ইলাখান ফুটানি ভাল নায়া।

17 কেউ যদি জানিয়াও ভাল কাম না করে, তে হে গুনার ভাগি অইবো।

5

ধনি অকলরে হশিয়ারি

1 ও ধনি অকল, হনো, তুমরার উপরে যে মছিবত আর, ইতার লাগি তুমরা কান্দে আর আহাজারি করে।

2 তুমরার ধন-সম্পদ বিনাশ অইগেছে, তুমরার কাপড়-চুপড় উন্দুরে কাটিলিছে।

3 তুমরার সোনা-রুপাত জংগারে ধরিলিছে, ই জংগারে তুমরার বিপক্ষে সাক্ষি দিবো, আর আগুনির লাখান তুমরার গোস্ত খাইবো। ইতা তো কিয়ামতর লাগি তুমরা দলা করি থইছে।

4 হনো, তুমরার ধান দাওরা কামলার যে বেতন আটকাইছো, অউ বেতনে অখন চিল্লাইয়া আহাজারি করের। ই কামলাইন্তর আহাজারি আল্লা রাব্বুল আলামিনর কানো গিয়া আজিছে।

5 দুনিয়ার বুকুত বিলাসিতা আর রং-তামশার মাজে তুমরা দিন কাটাইছো, দোজখর খুরাক বনার লাগি নিজরে খুব ফুলফুলা বানাইছো।

6 তুমরা নি-অপরাধিরে দুষি সাইবস্তো করিয়া খুন করছো, অইলে এরা কুনু প্রতিবাদ করছে না।

মছিবতো ছবর করা

7 গতিকে ও আমার মায়ার ভাই অকল, আমার মালিকে তশরিফ আনার আগ পর্যন্ত তুমরা কষ্ট করিয়া খুড়া ছবর করো। তুমরা তো দেখছো, গিরস্তে ভালা ফসল পাওয়ার লাগি মেঘর আশায় কিলা ছবর করি বই রয়।

8 তুমরাও অলা ছবর করো, অস্থির অইও না, কারন মালিকে খুব জলদিউ তশরিফ আনরা।

9 ও ভাই অকল, তুমরা যাতে আল্লার নজরো দুষি না বনো, এরলাগি তুমরা খালি একজনে আরক জনর খুত তুকানিত রইও না। হুনো, বিচার করার লাগি তো আল্লা পাক আমার ছামনে আইয়া উবাই রইছইন।

10 ও মায়ার ভাই অকল, যে নবী-রচুল অকলে মাবুদর নামে তবলিগ করছিল, তারার কষ্ট আর ছবরর কথা চিন্তা করি দেখো।

11 তারা তো কষ্ট পাইয়াও থির রইছইন, এরলাগি আমরা তারার গুনগান গাই। তুমরা তো আইয়ুব নবীর ছবরর কথা ভালা করি জানো, আর এওখান জানো, আল্লায় বাদে তনরে কিলা রহম করছিল। আল্লা তো দয়া-মায়ার সাগর।

12 ও আমার ভাই অকল, আমার আসল কথা অইলো, তুমরা কুন্জাত কছম করিও না। আছমানর নামেও না, জমিনর নামেও না, অলা কুন্ নামেউ কছম করিও না। এর বদলা তুমরার অয় খান অয়, আর না খান না অউক, যাতে তুমরা বিচারর দাড়ে না পড়ে।

মুনাজাত আর হেদায়ত করা

13 তুমরার মাজে কেউ মছিবতো থাকলে হে দোয়া করউক। কেউ সুখে থাকলে হামদ-কাওয়ালি গাউক।

14 কেউরর বেমার অইলে হে জমাতর মুরবিব অকলরে দাওত দেউক, তারা আইয়া আল্লার নাম লইয়া তার মাখাত তেল দিয়া দোয়া করউক।

15 তেউ ইমানর ছাতে দোয়া করার খাতিরে আল্লায় ই বেমারিরে শিফা করবা। হে যুদি গুনাও করিয়া থাকে, তে তার গুনা মাফ করা অইবো।

16 এরলাগি তুমরা একজনে আরক জনর গেছে যারযির গুনা স্বীকার কৰো, আর একে-অইন্যর লাগি দোয়া কৰো, যাতে ভাল অইতায় পাবো। পরেজগার অকলর মুনাজাত আচানক বলআলা।

17 ইলিয়াছ নবী আমরার লাখানউ রক্তয়-মাংসয় মানুষ আছলা। তাইন দিলে-জানে দোয়া করলা মেঘ না অওয়ার লাগি, হাছাউ সাড়ে তিন বরছ কুনু মেঘ অইলো না।

18 বাদে তাইন মেঘর লাগি দোয়া করলা, তেউ মেঘ অইলো, আর জমিনো ফসল ফলিলো।

19 ও আমার ভাই অকল, তুমরার মাজে কেউ যুদি বে-পথি অইয়ায়, আর কেউ তারে ফিরাইয়া আনে,

20 তে জানিও, যে মানষে কুনু গুনাগাররে বে-পথ খনে ফিরাইয়া আনে, হে অউ গুনাগারর জান বাচায় আর তার গুনা বেশি অইলেও মাফি পায়।

Sylheti New Testament (Bengali)
Sylheti: Sylheti New Testament (Bengali) New
Testament+

copyright © 2014 Ahle Kitab Society

Language: (Sylheti)

Contributor: The Seed Company

All rights reserved.

2020-11-30

PDF generated using Haiola and XeLaTeX on 18 Apr 2025 from source files
dated 29 Jan 2022

8c22fe10-239b-5db1-b41d-13aad0957f43